

寶
雞
縣
志

Ch 3155 / 1241 / 83

HARVARD COLLEGE LIBRARY
FROM THE
HARVARD-YENCHING
INSTITUTE

AUG 26 1980

Ch L 3155 / 1241 / 83

3821

乾隆乙巳年修

寶雞縣志

本署藏版

寶雞縣志序

志者學之師也才者學之徒也學者不患才之不贍而患志之不立周禮小史掌邦國之志志隸於史志者志也志定而後有言默則立象語則成文述千載之上若共一時辨殊俗之類若與同室自班馬陳范以至歐陽諸史所為章志貞教表微闡幽藏名山而為不朽之業者咸有以鑑其志之所存史既有之志亦宜然乾隆五十年之夏余奉

命告祭吳嶽江濱由隴入蜀來往道過寶雞邑令鄧簣山明府先示其所修洵陽志畢中丞序其書所謂勤求政本者是也既而事竣

節旋明府又持其脫稿寶雞志來告曰將鋟諸木乞言以弁其端余讀洵陽志事瞻思深殷然見守官之法焉寶雞志事核文古

斐然見學史之裁焉詩序曰詩者志之所之也在心爲志是以
一國之事繫一人之本謂之風風行天上君子以懿文德風行
地上先王以省方觀民設教志也者所以懿文德而宣民教也
自志屬公局其權易撓其職易侵不止如後漢東觀之所謂著
述無主條章靡立而已明府以地治之職成兩邑之書雖假草
創討論之勞而其閉閣勤思于役橐筆舉夫建置之廢與山川
之險易民生之豐儉士習之淳正俗尚之澆淳賦役之厚薄衷
諸志而有言因言成風所爲沐浴

膏澤而詠歌勤苦者思之也精故言之也切讀其書以求其志亦
可卽其志以徵其所著矣是爲序

乾隆五十年歲次乙巳仲夏月中澣

賜進士及第資政大夫內閣學士兼禮部侍郎仁和胡高望撰

寶雞縣志

凡例

一舊志始修於前明萬歷三十六年朱令炳然繼修於崇禎
十三年嚴令夢鸞

國朝順治六年薛令光前倡始編輯爲卷二十其書不傳十四
年周令愷續修之至康熙二十四年何令錫爵重修之今
所傳書三卷者是也其書雖荒略鄙舛原可等之自鄙無
譏至乾隆二十九年許令起鳳開局纂修自矜書倍事詳
則踈鑿矣其勢不得不改修前局士友尙有存者旣面告
以所以然共諒鄙衷非敢摭拾前人輕議其後也

一喬三石耀州志凡例云事涉國典海內所共有者不書星
野古以國論蓋括地遠矣亦不書洵陽志與鬼張柳之次

實分畛域首列分野一門彼此可以互見不必重衍前說也

一號縣分治元初始省入寶雞不知沿革何以未經列入茲采經史及水經地志諸書考據原委古來郡邑分合較若列眉省其橫表壁壘一新矣

一南方志乘局開集賢館坐嘯畫諾人自爲苟袁家自爲政駿矣旣而阿好誣先各立私傳劉知幾所云此實家謀非關國史是也長吏懲是之故閉閣簪筆虛懷謀野人物一志除考証史傳碑記外新增傳者不過十餘人其矜矜慎未敢私干其從前之泛濫無歸者稍加修飾庶幾人貌榮名各從其所安乎

一洵陽縣志故有錄史一門本紀列傳分次平列閱者微嫌篇幅之隔茲則經年緯月錄其實有關於邑事者本紀前書一格列傳分註其下事以類求非敢竊取紫陽綱目之義也

一邑人士遺集俱載本傳簡末不必另立藝文一則備列書名蓋名山藏少難彙集也然舊志藝文頗屬夥願其顯然牴牾者亟宜刪削如所載岑參號州後亭送李判官使晉絳絕句流寓傳又載其號州東亭送李司馬歸扶風別廬詩不知唐之號州屬宏農郡在今河南盧氏縣非邑南之號川也流寓傳又載賈島雲蓋寺絕句不知浪仙所寓者是鎮安西北四十里之雲蓋寺非邑西南之廢寺也至蘇東坡題號國夫人夜遊圖亦列藝文則不知其指歸矣邑南號川係諸葛武侯由漢中出斜谷之間道前人遊號川

記乃以魏延所云之子午谷當之則東西莫辨矣其餘郢
書燕說可以類推也

一山爲邑鎮川隨山導邑之山川渭水中流吳嶽迤其北終
南亘其南表以爲限萬壑千巖分支別派仍然聚米可數
至於金石考古事言尤資補自羽陽瓦篆以下暨長春成
道碑視舊志較詳矣其扶筇躡屩拭鐘捫石邑文學楊生
景美高生元掄王生步瀛楊生儲精王生濟壬李生步蓮
王生希鏊高生其節韓生慶雲茹生含芳實有勞焉

一邑中舊宦頗有藏書之家俱已散軼無可乞假仍就行笥
所有者綴葺成帙自愧疎略其編纂草創大半成於安康
董孝廉詔之手兒子傳安亦分任之分校勩事者則浮梁
鄭文學鳳儀暨從姪傳牧也至斟酌損益仍以己意折衷

其間蓋

重熙累洽大有頻登沐浴詠歌揚休導美自一隅達之天下以
俟輶軒之采云爾

易經全圖

易經全圖
卷之九
坤卦
坤者地也
其德順也
其性柔也
其色黑也
其味土也
其聲沉也
其氣穢也
其象也
其類也
其宮也
其祀也
其配也
其卦也
其象也
其類也
其宮也
其祀也
其配也
其卦也



界四里

西北交隴州界四十五里

西交秦州界九十里

西南交鳳縣界一百里

里十三百三




疆域圖

東北交鳳翔縣界五十里

東交岐山縣界九十里

界縣留交南

里十五百二界縣留交南







寶雞縣志目錄

浮梁鄧夢琴纂修

第一卷

沿革

疆域附

第二卷

山川

第三卷

建置

學校營制附

第四卷

渠堰

關梁附

第五卷

賦役

第六卷

祠祀 寺觀附

第七卷

秩官

第八卷

選舉

第九卷

宦績

第十卷

人物上

第十一卷

人物下

第十二卷

風俗 物產附

第十三卷

錄史

第十四卷

古蹟

第十五卷

金石

第十六卷

祥異 志餘附

寶雞縣志卷之一

沿革

疆域附

寶雞唐縣名

本

朝仍之屬鳳翔府隸陝西省布政司

其在上古曰陳倉爲

庖羲所治

水經曰渭水東經陳倉縣西酈氏引榮氏開山圖注曰伏羲生成紀徙治陳倉也非陳國所建也

神農所生

世本炎帝姜姓 帝王世紀曰炎帝神農氏姜母安登遊華

陽感神而生炎帝長於姜水

按今縣南有姜水南流注渭酈元注渭水不知遂以會杜



寶雞縣志卷之一
之岐水當之而謂岐水流經姜氏城南爲姜水復自知其
不確乃曰疑卽杜水矣 通志岐水在岐山縣北 寰宇
記原出麟遊普潤里東南流入漆水

黃帝都焉

路史疏化紀有熊氏少典之子王承填而土行色尙黃天下
號之黃帝身五十二戰而天下大服乃達四面廣能賢精功
務法秉教乘剛而都於陳注曰今寶雞故陳倉姚睦云黃帝
都陳倉非宛邱故今隴右黃帝遺跡甚多

唐虞夏商爲雍州陳國

禹貢黑水西河惟雍州 路史陳黃帝後姬姓國今寶雞故

陳倉有陳山

商末爲岐封內地號叔采邑

輿地記文王母弟號叔所封是爲西號 春秋孔疏號仲號

叔文王之時號君字也 賈逵曰號叔封西號

周爲畿內地曰西號後曰小號

晉書地道記曰西號地也 太康記曰號叔之國矣有號宮

平王東遷自此之上陽爲南號矣 括地志故號城在陳倉

縣東四十里 路史東遷之際自此之上陽爲南號其處者

爲小號

按省志引路史曰蒯伯繁國穆天子西征至於蒯蒯伯繁
逆天子郭地記陳倉有蒯城因謂蒯城在今寶雞縣東考
穆天子傳辛丑天子西征至於鄘人河宗之子孫鄘栢祭
且迎天子癸卯天子舍于漆澤乃西釣於河甲辰獵于滸
澤丙午天子飲于河水之阿天子屬六師之人于鄘邦之

南滲澤之上是西征者由北征而西非由鎬京而西也且
辛丑至鄜丙午屬六師於鄜邦之南是天子留鄜凡六日
而癸卯有西鈞于河之文則鄜在河東可知矣故不錄
東周爲秦地曰陳倉平陽

史記秦本紀文公十六年以兵伐戎戎敗遂收周餘民有之
地至岐岐以東獻之周十九年得陳寶寧公二年徙居平陽
武公元年居平陽封官十一年滅小虢二十年武公卒葬平
陽有子一人名曰白白不立封平陽 括地志寶雞神在岐
州陳倉縣東二十里故陳倉城中平陽故城在岐州岐山縣
西四十六里 元和郡縣志陳倉縣秦文公所築因山爲名
上城文公築 九域志虢縣有平陽鎮
秦曰陳倉平陽屬內史

漢書地理志右扶風故秦內史 應劭曰縣氏陳山

漢曰陳倉曰號曰蒯成曰平陽亭屬右扶風

漢書地理志右扶風故秦內史高帝元年屬雍國二年更爲
中地郡九年復爲內史武帝建元六年分爲右內史太初元
年更爲右扶風 陳倉有上公明星黃帝孫舜妻盲冢祠有
羽陽宮秦武王起 號有黃帝子周文武祠號官宣太后起
三輔黃圖曰號官宣太后起在今岐州號縣界 水經注

渭水東經陳倉縣南 通典漢陳倉城在今縣東二十里

舊志漢陳倉在縣東十五里前凸後凹中可容數千人 九

域志號在鳳翔府南三十五里 明一統志號故城在寶雞

縣東六十里 史記周繆傳高祖十二年以繆爲蒯成侯

輿地志蒯成縣陳倉縣之故鄉聚名周繆所封也

後漢曰陳倉曰平陽亭屬右扶風隸司隸校尉部

後漢書地理志劉昭補注陳倉三秦記曰秦武公都雍陳倉城是也有石鼓山 寰宇記曰魏後漢并於雍

按光武紀建武六年六月辛卯詔書省減吏員并合縣國則魏嘗於是時并也 又按馮衍顯志賦曰登平陽而懷傷章懷注云平陽縣名三國志楊戲季漢輔臣贊孫德果銳裴松之注李福字孫德封平陽亭侯故知平陽二漢原未廢也今補入

漢末屬漢安郡隸雍州

獻帝起居注中平六年省扶風郡都尉置漢安郡鎮雍隃麋杜陽陳倉汧五縣也 晉書地理志獻帝時罷司隸置雍州三國魏曰陳倉屬扶風郡隸司隸部

晉書地理志魏文帝卽位改京兆尹爲太守馮翊扶風各除左右仍以三輔屬司隸 水經注魏明帝遣郝昭營陳倉城諸葛亮圍之不利而退 元和志陳倉城魏太和中郝昭所築今有上下二城下城是昭築

晉曰陳倉屬扶風郡置蒯城屬始平郡同隸雍州

晉書地理志晉初于長安置雍州惠帝卽位改扶風國爲秦國 宋書郡國志曰陳倉令屬扶風晉太康地志屬秦國輿地記蒯城縣故陳倉之故鄉聚也晉武帝咸寧四年分陳倉立縣屬始平郡尋廢

苻秦時置武都郡置苑川縣

十六國春秋苻健于三交城置武都郡 元和郡縣志三交城在縣西司馬宣王與諸葛亮相拒所築 縣舊志今在縣

西四十里 周地圖記晉末陳倉縣廢苻姚時于縣界置苑川縣
案元和郡縣志謂苑川在天興縣西四十三里乞伏乾歸據此自號西秦而縣志亦云苻登太初二年乾歸據苑川自號西秦俗呼秦王寨考晉書載記苻登始由狄道下秦隴自陰密攻姚萇汧雍二城克之又與戰於汧東爲萇所敗登入朝那萇據武都相持屢戰互有勝負及敗於姚興單馬奔雍興率衆攻之登遣子汝陰王宗質於隴西鮮卑乞伏乾歸結婚請援乾歸遣騎二萬救登登出迎與戰于南山被殺是則當苻姚之時此地正二國戰爭之處卽乾歸亦但遣騎救之一敗旋去不聞據苑川也乾歸之苑川自在今金縣之西南苑川城見甘省志

後魏曰武都郡領平陽苑川隸岐州

魏書地形志岐州太和十一年置領三郡武都其一也郡太延間置平陽縣真君六年置 寰宇記號縣漢并於雍後魏立爲武都郡 文獻通考後魏于扶風置平秦郡兼置岐州按地形志無苑川考隋書地理志陳倉後魏曰苑川是知苑川固未廢也今補入
又按十六國春秋所云苻秦于三交置武都其地在今縣西寰宇記所云後魏卽號廢縣立武都其地在今縣東蓋徙其治而仍其名也

西魏曰武都郡陳倉洛邑屬岐陽郡

隋書地理志武都郡開皇初廢後魏苑川西魏改曰陳倉後魏武都西魏改曰洛邑 周書圖記大統十六年移苑川縣

入漢陳倉故城復爲陳倉縣卽今東二十里故城是也
文獻通考曰西魏改平秦岐州爲岐陽郡也

按平陽隋志不載當于是時廢矣

北周曰武都郡顯州朔州屬岐陽郡

隋地理志陳倉周置顯州尋州縣俱廢洛邑周置朔州州尋

廢寰宇記周天和中於縣置朔州尋廢州移周原郡理之

省志按武都郡隋開皇初廢寰宇記又云移周原郡理之

互異且周原郡未詳舊置何所

隋曰陳倉曰虢屬扶風郡

隋書地理志扶風郡舊置岐州大業初置扶風郡開皇十八

年於後周故顯州置陳倉有陳倉山有關官後魏武都郡開

皇初廢大業初置虢周書圖記大業十年移陳倉舊理於

渭北留谷城卽今縣寰宇記大業三年改洛邑爲虢縣

文獻通考隋初置岐州煬帝初州廢置扶風郡

唐曰寶雞曰虢屬關內道鳳翔府扶風郡

舊唐書地理志隋陳倉縣至德二載二月十五日改爲鳳翔

縣十八日改爲寶雞次畿貞觀八年廢虢縣入岐山天授

二年復分岐山置虢縣次畿新唐書地理志岐州至德元

載更郡曰鳳翔二載復郡故名虢西京爲府上元二年罷京

曰西都未幾復罷都文獻通考唐爲岐州或爲扶風郡後

改爲鳳翔府節度屬關內道元和郡縣志乾元元年改陳

倉爲寶雞以昔有陳倉寶雞鳴之瑞故名之

按新唐書次畿本陳倉至德二載更名與舊唐書合元和

郡縣志所云則後一年

五代仍之屬岐州鳳翔府

職方考岐爲鳳翔唐晉漢周俱有

宋仍之屬秦鳳路扶風郡鳳翔軍節度

宋史地理志寶雞號皆次畿 文獻通考紹興十二年和議

成割和尙原遺金縣遂爲金有

金仍宋制屬鳳翔路總管府

金史地理志大定二十七年升鳳翔爲總管府寶雞有陳倉

山渭水鎮一曰武城號有楚山渭水鎮一曰陽平

元曰寶雞屬鳳翔府隸陝西行中書省

元史地理志初立鳳翔路總管府至元九年更爲散府 明

一統志號縣元省入寶雞

明仍之屬鳳翔府隸陝西承宣布政使

明史地理志洪武二年置陝西等處行中書省九年六月陞

行中書省爲承宣布政使司

今縣治東至鳳翔縣界之第五邨七十里至岐山縣治一百

一十里

南至漢中府留壩廳界之上太白二百二十里至留壩廳治

三百五十里

西至甘肅秦州界之仙靈峪九十里至秦州治五百里

北至隴州界之縣頭鎮四十里至汧陽縣七十五里

東南至岐山縣界之水寨九十里至郿縣治一百三十里

東北至鳳翔縣界之王家邨四十五里至府治九十里

西北至隴州界之葫蘆口四十五里至隴州治一百五十里

西南至鳳縣之黃牛堡一百里至鳳縣治二百一十里

又東南至西安府盩厔縣界之細水河二百五十里至盩厔縣治三百五十里

又西南至漢中府洋縣界之黃楊二百七十里至洋縣治三百七十里

凡廣約一百八十里袤約二百六十里至陝西省城四百四十里至

京師由河南道二千八百九十里山西道二千二百六十里

論曰傳有云望遠者難悉其容聽遠者僅聞其聲立乎近今以指三代已莫辨其溝壑矣況進而上之鴻荒之際哉顧言不雅馴固難述自薦紳而專備簡編豈得例諸虛妄渺茲百里封遡三皇蓋不敢以爲覈者竊所以爲慎也秦漢以來離合屢異大約地偏則以兼圻示富未嘗官衆而

役繁統一則以省事宜民自見用舒而食寡綜數朝而撮要當年之繭絲保障攸分邁千古而獨隆

盛世之休養生息斯溥攷其沿革廢興之故列眉貫繩經緯錯綜歸於

大統卽一隅而益徵車書之無外也至若廢邱有封紀月表於秦楚岐國竊據割星野于梁唐繫異苞桑軒偷卧榻未等蠅息難分瞬光論史不妨撚陳分書無庸濫附矣

寶雞縣志卷之二

山川

縣北之山皆自吳嶽來其脉絡雖不可晰今據其可名者自西而東山原凡十有二

西四十里曰佛巖

俗名西武當北連吳山洞開陡壁飛閣懸樓實為奇麗

西二十里曰長坡原

北通吳山南繞渭水陸川在左硤石帶右為秦川平原之盡處

西二里曰紫草原

以原產紫草故名北通吳山之陰左玉澗右硤石細峽中結大阜漸平闊三里餘民居錯處前為太平嘴

直北曰陵原

自吳山綿亘而來起阜開屏為縣主山府志論邑之形勝所謂左金陵右玉澗面渭水背陵原即此山也

東五里曰蟠龍山

於西平原盡處突起一峰形如龍蟠故名上有居民堡塞

王士正隴蜀餘聞蟠龍山有故相國黨太保崇雅別業今圯

萊陽宋琬寄党太傅詩

三首錄一

聞道東山有草堂清秋葭菼露蒼蒼散金宗族門常滿爭席

田翁醉不妨甲第惟餘官一畝午橋可有樹千章何時來訪

烏衣宅再拜趨陪弟子行

浮梁鄧夢琴題党太保別業詩

夕陽斜照下高原戟散鳥飛尚有邨青嶂苔深埋石馬沙堤

草軟嫩朱軒叔孫身貴張綿撮白傅人歸醉社尊可憶滇池

旋素旆停杯嗚咽不堪論

楊文烈公藉張軍門歸骨其時太保尚在

重門寂寂

曾更主流水潺潺不復灣石寶平泉評買價書殘鄴架散人

間後園客罷飄帘動

城中舊第已為酒肆

優孟歌聞負薪還剩有西州

門下淚遺詩三疊尙容刪

東北十里曰蝦蟆原

一名蝦蟆口為陵原一支三面陡絕一峰獨出上有堡寨

險要

東十五里曰西平原

舊志原之高峻處又名大蟲嶺金徒單合喜傳吳璘分據大

蟲嶺即此原也北通馬跡西南通蟠龍東汧水西金陵南環

渭長亘五十餘里北橫二十里南橫三十里

按金石門唐馮十一娘墓誌葬於陳倉之新平原今邑無
新平原恐卽聲轉之訛耳

東北二十里曰賈邨原

原爲西平原東北隅一阜東臨汧水三面阻絕上築堡有市
井可容千家党太保題曰龍川雄鎮

東三十里曰周原

卽岐周地北連鳳翔東通岐山西臨汧水南環渭川自石鼻
寨至第五邨五十餘里皆周原地

邑人趙尙哲詩

雍州積高區嶽隴雄西障森如駐羣馬駟駿不奔放一線趨
渭汧千里割平曠太華制其幅黃流曲爲防地實周原始勢
據建瓴上餘衍包岐咀峭崖敵渭漲昔年定都人先後兆霸

王虢守分周畿寶祠沿秦創近帶封宮闕遠揖臯門闕盛烈
久寂寥遺跡自宏壯伊余耽登覽於茲快眺望樹排遠邨薺
鴻冥寥天行參差橫秦嶺表裏窮殊狀綺交每每田沃憶臚
臚唱步接堇如飴畛有黍相餉聲教頌西被同披惠風暢

東北四十里曰白荆山

左右有流泉入西渠上有姜嫄廟於西平原盡處兩邊皆下
其中突起一峰

東北五十里曰馬跡山

俗名黃梅山岡巒環列松柏森秀禱雨有應南有馬塚俗傳
周穆王埋駿馬於此北通隴州玉皇山南接西平原

東七十里曰磨性山

背倚周原前臨渭水相傳邱長春燒丹之所有墨刻山圖

安康董詔詩

東嶽峰入層霄森然俯大壑岡巒紛紫紆靈氣自盤礴崖削樹
駢附泉高珠迸落遠揖關尹宅橫帶號叔郭地曠眺難窮天
低雲易閣昔聞逃虛客寂焉此栖泊心靜蓮塘瀾跌深石室
鑿本空塵外緣寧須他山錯磨性何以名毋亦後學鑰萬里
附燕驛千年冷表鶴清風白雲杳邱長春至元
京栖白雲觀碧嶂丹青託
境尊仙靈宅蹊交遊歷屨竭來當秋暮雙泉溯連嶂稍入情
為移久之心俱淪迴飈驚樵徑歸詠辭林薄却顧嶽崎途蒼
烟橫略約

縣南之山皆自秦嶺來今按其可名者自西而東凡三十有二
秦嶺即終南山橫亘縣南

省志終南一山首聯羌隴尾蟠商雒左渭右漢挾二水以分

流北雍南梁為兩州之界劃瀟路懸車褒斜綰轂類皆由
道以出奇亦可因地形以設險古以關中為天下之脊實以
終南為關中之脊也

今按秦嶺西南自秦鳳入縣界東至岐山桃川里綿亘一百
九十里所有附嶺諸山得備列焉

邑人毛儀詩

山亘東西遠水分南北流北連秦晉帶南送荆吳舟

縣西南一百一十里曰錦繡山

在黃牛舖西十里許上有石洞可容數百入中有石像如人
形者又有一潭水極清冽旱禱輒應

西九十里曰鳳皇山

西南六十五里曰煎茶坪

省志俗傳漢高祖引兵由故道出駐馬於此上有清泉水極甘美卽秦嶺也

新城王士正詩

大壑沉雲霧冥冥萬仞梯孤峰分隴漢兩水劃東西遙直金牛峽旁臨白馬氏當年誰設險不用一丸泥

上海喬光烈詩

萬山蟠西南秦蜀本阻絕古來人力通始見鳥道接鑿石架危棧功用從此設何必驅五丁摧山崩巖嶒大府昨下符伊余事規臬伐木聽邪譎斬崖觀構結路入溪嶺深夜照岩際月坪上數家邨土屋受風裂燈前聞虎嘯颯颯墜林葉願共李將軍明日南山獵

德化陳奉茲詩

諸山將趨太華峰峰峰學作太華勢太華奇絕不可學如心向往惟未至帶雍襟梁地絡長躔輝兩戒挈天綱無窮草木有今古令我僕夫徑息裝老夫徜徉莎可藉卧視天雲也學華睡美山鶯喚人醒藤花香過妙于麝

西南六十里曰瀑布山

在半坡舖之西泉自上下下如匹練然

合肥許孫荃詩

恠底行人垂馬鞭茶坪高處有清泉飛流倒挂吞三峽匹練橫拖下九天

西南五十二里曰大散嶺

綱目質實嶺下有關通褒斜大路胡三省通鑿注嶺在梁泉縣松嶺堡南

西南五十里曰大王山

山爲觀音堂南屏攀崖而上有旗杆石基五宋吳玠鑿之以防金兵有靈泉二旱禱多應東連一嶺稍平卽和尚原之脈也

按此計其道里與大散嶺同或者大王卽大散之訛也存

疑

西南八十里曰蛇山

賈志其山多蛇人畜臨之不驚不噬

西南四十里曰和尚原

宋中興四朝志和尚原鳳之東境抵鳳翔不能百里自兩當縣直出鳳州取大散關詎原纔咫尺今按原在縣南六十里大散關之東由上神谷入山踰大王嶺涉東峪河至原三十

餘里其形邊仰中凹廣袤約有千畝

浮梁鄭鳳儀詩

海角班聲動地起長驅飲馬清渭水駕岸營連石作城遙與散關相對峙巉絕一髮巴中天其勢未敢遽窺耳誰與力遏千熊罷振旅桓桓連臂使九泥兩戒封雍梁當壁一夫爭尺咫憶戰青溪敵膽寒彭原更掃郎君壘如何五路輕出兵遂令三輔失方軌退屯不肖扼漢沔遺柑猶足張角犄偏安事業小朝廷半壁東南全繫此當時父老饋壺漿至今廟祀薦尊醜益門嶺有吳武安祠落景高原野色昏訪古羌知何者是巖風箐雨捲靈旗空傳遺石荒烟裏

西南二十里曰散社山

上有九天聖母洞歲旱禱雨輒應

浮梁鄧夢琴禱雨詩

禱湫先視夜出郭尙聞更沉月吳牛喘危枝宿鳥驚渠分溜

路滑磨轉激湍鳴莫怪催耕晚將逾九十晴晨星餘點點

夕露隱濛濛寧斬一犁足長吹五兩雄時南風競甚暮雲愁渭北

喜雨憶湖東月之三日春中東湖耕籍得雨碑碣騎行速循山水未窮中

分雲棧跡來問塔梢津佛寺誰飛錫舊有塔精寺仙源別有春澗

泉緣路曲山鳥喚人親平行成邨落耦耕久卜隣一榻容

星稅汗顏說憫農偏來鄉祭酒殷慰老冬烘其雨憑筭卜卜筮

云明日有雨自西待筮通頻勞望歲意轉瞬慶年豐水涼幽室

靜地號水春暖裕衣襪筇杖雙鳧助芒屨五嶽蹤癯逢如熟

識隸訝失塵容堪坐漁磯釣還宜潑雨從兩溪襟帶合山

麓結荒祠白石長滋薛靈風莫滿旗三清疑恂恍山頂有四玉皇閣

澤望淪漪一勺傾盆瀉寸膚盈野施

西南十五里曰八弓原

南連縣頭嶺西北臨渭河形有八角爲縣西屏

曰縣頭嶺

上有玉臺觀

曰三鳳山

脉發八弓原至此結穴

直南四十里曰天台山

諸山環拱崗阜突出形似蓮臺上建聖母宮後度五層樓山

腰有洞旁淳靈泉早禱有應

南二十五里曰禪堂山

在天台山口陡壁四面當隘一門架以板橋行難並肩一名

伯陽山

南二十五里曰中巖山

卽翠峰其峰尖銳俗名尖山

南十八里曰諸葛山

在益門山東乃武侯屯兵之處形勢類五丈原土人嘗掘得銅碑刻風雨篆文有武鄉侯諸葛亮製字及鐵蒺藜等物

南十五里曰益門山

雍勝略卽秦嶺北麓之峪山巖險阻凡有事梁益州者必取道於此故名

東南十五里曰石鼓山

後漢郡國志陳倉有石鼓山將有兵此山則鳴 省志石鼓記周宣王田獵之事本在此山故名

新城王士正詩

遙憶岐陽狩來過石鼓山韓蘇今地下星斗尚人間谿谷歸飛少川原獵騎還寄情沂渭水千折過潼關

東南四十里曰八魚原

八魚河出其下相傳太公於此釣得八魚

東南五十里曰九龍山

一峰當中九山環拱上有玉皇宮

東南五十里曰遠門山

在石塔山口孤峰特立極爲奇峭蒼松蒼蔚青翠欲滴

東南五十五里曰草坪山

在雞峰山下突起一峰並峙遠門

東南六十里曰石塔山

北接草坪東瞰礮溪其形如塔上有石盆旱則禱雨

明灤州許莊詩

岫嶙一柱插雲霄峭壁層層劒戟搖寶塔遠驚舒翠黛石盆
遙望瀉天瓢霞收晚氣猶吞頂雨散朝嵐尙東腰欲駕飛車
遍滄海手憑雲漢聽吹簫

東南六十里曰香巖

相近有清風臺天真洞相傳爲邱長春修真處

東南七十里曰陳倉山

三峰如削陟巔者必援鐵索而上有石雞大如羊 雍大記
一名雞峰山 水經注陳倉山上有寶雞鳴祠 元和郡縣
志山在縣南十里南接梁鳳二州界 明一統志山有三峰
並峙爲一邑之冠 賈志秦文公伐梓樹卽此相傳山有石

雞與山雞不別

按水經記載列異傳曰武都故道有怒特祠云神木南山
大梓也小注互載秦文公伐樹之事並未確指在此山賈
志未知何據又按封禪書獲若石云於陳倉北阪城祠之
卽二童子化爲石之陳寶也今陳寶祠在陳倉故城東與
史記之北阪相合土人曾于渭水中獲石雞二雖未必卽
其遺跡恐係後人之立象以徵典者然總不在渭水之南
此山當依雍大記名雞峰山其陳倉山應在故城北阪之
上

東南七十里曰雲臺山

由馬峪河入三十里谿壑盡處突起一峰壁立千仞儼似蒸
甑每值朝夕烟雲湧出如畫

東南八十里曰響靜山

上有佛洞孤峰矗立遙與雞峰對峙明邑令熊汝濂榜題曰

響靜山

東南一百二十里曰石樓山

層巒疊嶂狀如樓閣

東南一百二十里曰八盤山

自秦嶺迤邐而南三十里至號川一峰壁立屈曲八盤上有

真武宮松竹交加蒼翠欲流

東南一百五十里曰分水嶺

係桃號二川交界水從秦嶺分東西流諸葛武侯師出斜谷

駐兵於此俗名五里坡

東南一百八十里曰青峰山

其峰秀麗四時常青山上青松皆大數十圍唐建青峰禪院

東南一百九十里曰玉皇山

山勢險峻禱雨神應異常非極旱不敢輕入極巔有鐵殿二

傍有石大數十丈有五方池七星臺七星塔其山高出秦嶺

風雪時興草木皆萎鳥雀不聞人跡罕至

號縣有楚山

見九域志今無考

大川一曰渭

桑欽水經渭水東過陳倉縣西 酈道元水經注渭水東與

捍水合又東而右合南山五谿水諸澗流注之也又東與綏

陽谿水合又東汧水入焉渭水之右礪溪水注之渭水又東

經石原即北原也 省志渭水東逕隴州又東入寶雞界

縣在

西之仙
靈峪

長蛇川東流入之又東逕八弓山北塔河自大散嶺
北流入之又東流玉澗水自縣西而南流入之又東逕寶雞
縣南一里清澗水自煎茶坪東北流入之又東金陵河水自
隴州來逕縣北之陵原東南流入之又東清水河自石鼓山
北流入之又東汧水會焉又東至朱家灘入岐山界
渭北之水自西而東凡十有二

西十五里曰陸川河

省志卽楚水一名長蛇川按縣平川至此而盡以西皆崇山
峻嶺水源出隴山經風泉山南流入於渭水經注渭水南
與楚水合世所謂長蛇水水出汧縣之數歷山東流逕長蛇
戍又南流注于渭闕駟以是爲沂水焉

西十里曰硤石河

源出吳山之陰兩岸皆原夾石而出南入渭

西二里曰流玉澗

源出陵原左腋岸夾山原流二十里至玉澗堡始入平地灌
田行磨南入于渭

東五里曰金陵河

源出吳山至隴州縣頭鎮與柴川水合南流至分界溝入縣
境又南三十五里至金陵店西折而入渭

金陵河之附支曰娑羅泉水

省志在縣東二里源出金臺觀下泉溢然流道左循流而行
柳陰中鳴聲灑灑伏流從石龍口中噴出有菴翼然水鳴竇
中松檜覆階藕塘花畦泉流分灌中有三大士殿邑東第一
名勝

浮梁鄧傳牧詩

密林夾石石髮濕靈湫出坎入坎習偃藤垂枝相覆撐一束
林於碧影立過耳洗盡箏笛聲驟聽乍愁風雨急大珠小珠
錯落間冷冷疑聞絃指輯是中得毋移我情白日冥濛雲霧
集也知負郭無多遠飄然遂脫塵網繫還將砂銑試龍團烹
湘不用銀瓶汲曹溪一滴此發蒙何如鄉味西江吸解衣磅
礪窮其源落葉悠悠隨流出

東二十餘里曰三疊泉水

許孫荃華岳集寶雞治東三十里官道旁有滴水泉從石上
三疊而下錫名爲三疊泉系之以詩
空山殊未雨何自百重泉三疊傳聲處依稀太古絃

浮梁鄭鳳儀詩

驛程一舍記松牌兩餘滑笏收蒼靄路旁指點泉壑偉水光
泐泐聲泚泚古巖截業高復欬一折三疊灑青綱水因石勢
成滋瀆倒懸雲窟鏡影揩挂空絕類鍾乳排采食不慮仙緣
乖四圍老樹積如稽陰洞晝掩呀然闖人家負厂小於蠅下
臨官道走鞞輦好景過眼誰能懷飛流一帶繞荆柴出山清
比在山厓浸被稻田茁芽荻溶溶東匯大川涯攜我竹策糲
毛鞵題詩峭壁無歲叢疑隔紅塵不可階

東三十里曰武城泉水

水出西平原下經武城寺南入渭

東三十一里曰汧水

水經注水出汧縣之蒲谷鄉弦中谷決爲弦蒲藪東北爲魚
龍川又東會吳山水水溢石空縣波側注北流注汧汧水又

東經隄麋縣故城南又東流入於渭省志汧水南逕鳳翔縣西界又東南入寶雞界即縣之西渠里至底店入渭汧水之附支曰蕭邨泉水

水出西平原下東流入汧山入渭魏縣東曰安坡泉水

出小蓬壺旁兩泉合流歷閣子堡至皮李堡南入渭又東曰西高泉水

水出磨性山下兩泉合流至楊家邨南入渭又東曰東高泉水

水出周原下南入渭二泉俱縣東七十里渭南之水二十有四

西一百一十里曰仙靈峪河

有二源一出鳳縣孟家灘一出鳳縣崔明灘合流至縣界潭廠溝北流三十里至仙靈峪入渭

西七十里曰楊家河源出麥澗峪北流至馬頭上入渭

西南四十里曰晁峪河源出西土門山西流四十里至晁峪口折而入渭

西南二十里曰小寧河源出沙坡灘東北流三十二里至三鳳山入渭

西南十五里曰大寧河源出將臺山下東北流三十里至八弓原入渭

西南十五里曰塔河省志即捍水自鳳縣界來東南流入渭今按源出池嶺下逕

戩社山東流五里石受大溝河水又東左受四溝河水至塔
稍寺北流入渭 水經注其捍水出周道谷北逕故道縣之
故城西又東北歷大散關入渭至八百里入渭
直南二里曰姜水

水有二源一發於十八灣至三鳳山口爲下神岔河一發於
白石崖繞大王山西流至大散關爲上神岔河北流入棧道
又東流十五里與下神岔河合又三十里受蒙峪河水又五
里經姜氏城至石家營入渭

蒙峪河

在縣南十里源出諸葛山之東逕西北流十五里入姜水
南五里曰瓦峪河 源出燒香臺北流三十里至瓦峪寺入渭

南六里曰石壩峪河

源出天臺山西北流五十里入渭

東南十里曰龍山河

源出陳家溝北流二十里至党家邨入渭

東南十五里曰茵香河

源出雞峰山下西北流五十五里至石鼓山入渭

東南三十里曰清水河

省志卽陳倉水 水經注陳倉山下東流至於渭
今按水有二源一發墨凹山下一發雞山之陰二水相合爲
西岔河又北東四十里合八魚河入渭

八魚河

水發於八魚原西北流十五里入清水

東南四十五里曰馬峪河

河傍有石窠如馬跡今按源出秦嶺根屈曲流七十里經石門口又十里至鳳皇頭北入渭

東南五十里曰洛谷水

省志卽綏陽水源出明家坡北流十五里入渭今按源出祁家溝水經注綏陽溪水自承斜谷水自斜谷分注綏陽溪北屈陳倉入渭

東南五十里曰箕谷水

省志源出箕谷北流三里入渭

東南五十里曰成道宮水

源出石塔山東北流逕遠門山草坪山煙霞洞鳳女臺環成道宮約十餘里入渭

東南五十里曰磻溪河

水經注水出南山茲谷乘高激流注於溪中谿中有泉謂之茲泉泉水潭積自成淵渚卽呂氏春秋所謂太公釣茲泉也今人謂之几谷石壁深高幽隍邃密林障秀阻人跡罕交東南隅有石室蓋太公所居也水流次平石釣處卽太公垂釣之所也其投竿踞餌兩膝遺跡猶存是有磻谿之稱也其水清冷神異北流十二里注于渭括地志茲泉出岐山西南几谷通典號縣有磻谿太公釣處明一統志在縣東南八十里省志一名璜河源出秦嶺北流五十里入渭今按源有三左源出石榴山曰貝江河右源出青峰山曰十二盤河中源出菩薩山曰豬頭坪河三河相合北流十五里經釣魚臺又五里出伐魚口入渭又按水經注太公釣處卽磻

溪水今土人謂之伐魚河而反以成道宮前之水爲磻溪想因磻溪宮而彼此互訛也自應釐正庶脈絡分明矣

東南七十里曰毛家河

源出三盤關東北流二十里入渭

東南七十五里曰八廟河

源出黑虎關北流三十五里入渭

東南八十里曰東溝河

源出東九龍山西北流二十五里入渭

東南九十里曰沙口河

源出走馬嶺流二十里至張家邨入渭

東南一百里曰甕峪河

源出老君山流三十里入渭

秦嶺以南之水二

西七十里曰凍河

省志西南流經黃牛堡入鳳縣界今按源出麥澗谷南明洪

武初瑞麥出此水自煎茶坪西流而南三十里入鳳縣界即

凍河楊家河之源也 水經注濁水東南兩當水注之水出

陳倉縣之大散嶺西南流入故道川謂之故道水西南經故

道城東即嘉陵江之支源也

東南一百五十里曰號川黑龍泉

水經注褒水出衙嶺北山東南流逕大石門 寰宇記號縣

有桃號川路通漢中 省志號川水源出奧山下北流十里

又折而西流六十里逕進口關入鳳縣界即鳳縣紫金水之

源也今按黑龍泉出秦嶺黃竹原上始流微細合號川水四

十里入鳳縣界逕白銀峽江口三百餘里下達武關其流最大此黑龍江之源也

伏泉二十有七

九龍泉

府志在縣南二里泉出九穴其水清冽今按泉在姜氏城東相傳炎帝始生浴此有浴聖九龍泉碑邑令許起鳳禱雨有應記事勒石

溫泉

在治東南三十里溫水溝澄清瑩澈四時常溫

涼泉

在東南二十里白石盆出其冽異常

吾泉

在觀音堂玉女祠旁有襄平合世德記

周公泉

在東南五十五里礮溪宮右

甘泉

在東南一百里龍虎山下水味甘美不涸不溢供給千餘家

農人渚

在東南五十里礮溪河口卽太公垂釣遇異人處

白雞泉

出小蓬壺旁其泉靜深水不流溢

洞坡泉

在東六十里泉出洞坡下

暖泉

在號縣東五里

雞跑泉

在東二十里祀雞臺下禱雨有應

猗園泉

在縣署後党太保猗園內因名乾隆十二年曾引入泮池

涸

八角泉

在八角寺明宏治間邑令許莊鑿引入城

空洞泉

在空洞寺雍正初邑令劉光然引入東關

阿谷泉

在礮龍山下水味清冽觸穢輒涸祭禱復通人號神泉

劉家泉

在龍泉寺下

靈泉

在靈泉寺東

菜園泉

在菜園寺旁

交龍泉

在交龍寺左右交流

清泉

在清泉里清泉觀前

清洪二泉

在星雲觀後

迴龍泉

在破石橋南其形如盂極清冽滲入石穴復噴湧而出

玉女潭

省志縣南二十五里玉女祠下

清溪泉

在啟靈觀後

蹇家泉

在蹇家谷

龍泉

在渭寧里泉旁有寺

論曰秦嶺為終南之脊綿亘邑南幾二百里即河山之所
以分兩戒也山南之水注嘉陵江山北之水皆注於渭渭

自隴州之石門來逕縣南東北流入岐山境逶迤曲折尋
其原委無所謂湜湜其汙者而詩顧云涇以渭濁何也說
者謂渭未受涇之時雖清而未甚見及二水既合而清濁
始分然則渭本非清較之涇水一石其泥數斗者僅勝之
耳非若江漢之原委俱清也顧最清者莫如江漢而詩惟
言江永漢廣而不及其清渭之清蓋遠遜於江漢者也乃
因東會于涇而清之名以顯而邑南諸川半發源於秦嶺
其注漢者清則同清注渭者濁則同濁豈非其所經之道
不一所匯之澤亦殊所趨之途各異耶然攷山南之故道
水為西漢附支山北之茲泉長蛇川諸水為渭附支均見
于水經注未聞別乎其清濁也秦漢時望祀徧于山川山
北之水涇渭汧洛皆非大川以近咸陽得比諸山川祠皆

歲禱賽泮涸而山南之水自沔祠漢中江水祠蜀之外無
與于祀典者則川之有靈有不靈不必其流之有清有不
清也蓋嘗論之天一生水天得一以清水之源無不清也
其所之而有異者蓋遇石則清遇土則濁石剛而土弱也
此亦如人氣質之性剛則有常柔則無立剛明而柔暗也
不然居天下之中西臨于戎東距于闕分兩戒而萬古常
貞者非以其剛故耶然終南合土石而成質非石不貞非
土不產而其所向之陰陽亦遂分水之清濁然則太剛則
折至察無徒者不又可因此而悟學耶茲志之列山川也
以渭之南北爲限渭南諸山首表終南蓋地絡之陰陽百
川之所從出也渭北諸山川亦因其距邑之遠近而條析
焉庶幾千巖競秀萬壑爭流者俱如指上螺紋可展卷而

分之矣

寶雞縣志卷之三

建置 學校營制附

縣城周二里七分門三東曰迎恩西曰來遠南曰解阜脉自崑山來蜿蜒一百二十里前渭水後陵原左金陵右玉澗面波千頃目秀萬峰城建自唐至德二載明景泰二年知縣劉通重修萬歷中師嘉言建東西月城崇正七年李嘉彥續修十三年知縣嚴夢鸞新增南門月城并建南門水城濬玉澗之水繞郭東注金陵河今水城久湮入

本朝來順治八年知縣張六部因久雨壞城倡加修築邑人党崇雅有築城碑雍正元年知縣劉光然懸鐘于東門乾隆七年知縣喬光烈建奎宿樓于城東南隅二十八年知縣許起鳳請帑增修圍長九百三十五丈五尺頂闊一丈五尺高二丈五尺內

外門六樓三奎樓一鐘樓一更樓五更房四馬道五柵門三砲臺八水道十八有修城碑記

按唐書地理志至德二載改鳳翔縣爲寶雞縣郡志因謂城築於是年攷周書圖記隋大業移陳倉舊理於渭北留谷城卽今縣周書高祖紀天和元年秋七月戊寅築武功郡斜谷武都留谷津坑諸城置軍人是留谷先已有城不始於至德也郡邑志俱未之考耳

風匣城附城北之阜上跨原麓下屬北城之陰創於前明嚴令夢鸞許前令修城時倡捐增修上祀文昌武曲奎宿諸神以應東城巽卯二峰之秀有碑記

縣署在城西街北唐至德二載建據省志明洪武初知縣吳添重修成化七年知縣張珣建大門樓大門內東爲土地祠鄴侯

祠共三楹西爲監獄內爲儀門者三闔內有戒石坊一座再土爲大堂三楹捲棚三楹東西吏舍各十楹東庫房二楹又內爲二堂七楹乾隆十九年知縣明福重加修葺舊爲存愛堂五十年知縣鄧夢琴易以學愛之額增建捲棚三間二堂前左右門房各二楹東偏西向門三間內南向客室三楹北向幕寮三楹俱前令張雲龍建稍前書室三楹翼室三楹再前花亭並前廊共六楹西偏書室三楹前庭五楹再西室三楹後廚房三楹最後三堂七楹翼室四楹又東偏書室五楹翼室四楹自二堂以內俱乾隆五十年知縣鄧夢琴領項重修

縣丞署在縣署東乾隆十九年改遷東河驛卽所裁東河驛驛丞之舊署也二十六年署令郭元灝倡邑士捐買舊署置石鼓書院其東河丞署歲久塌壞不堪後任仍於書院權寓歲給賃

貴四十四年縣丞李心澄詳請修葺凡大門一闔二門三闔班房六間大堂三間二堂三間書樓二間門房二間三堂五間翼室二間廚房一間

典史署在縣署西乾隆十七年典史梁繩祖捐俸增修現今大門一闔大堂三間書吏房二間班房二間門房二間書房三間中庭三間內室三間翼室四間廚房三間乾隆三十九年典史諸廷標詳請重修

監獄內獄神祠一間內監四間外監四間女監三間更房一間乾隆四十年知縣王廷燮詳請重修

號川巡檢署在號川門一闔東西班房二間大堂三間二堂三間西邊廚房一間東邊書房三間乾隆三十七年巡檢陸維新詳請重修

主簿舊署

益門鎮巡檢舊署

陳倉驛驛丞舊署俱久圮無

考

察院行署 布政司行署 關西道行署 鳳翔府行署俱久圮無考

東關外公館大門五間二門三間捲棚五間中庭五間上房五間翼室十二間乾隆四十一年知縣王廷燮建四十八年知縣鄧夢琴重修其上房五間卽所增建也有棠陰暫憇之額

底店公館舊有上房三間乾隆二十八年知縣許起鳳捐修大門三間二門三間捲棚三間翼室四間四十八年知縣鄧夢琴重修

觀音堂公館大門一間庭三間上房三間乾隆四十一年知縣王廷燮建四十八年知縣鄧夢琴捐修翼室三間茶屋一間

黃牛舖公館大門三間二門三間捲棚三間上房三間翼室十
二間厨房二間乾隆四十一年知縣王廷燮建四十八年知縣
鄧夢琴重修有鴻漸遵陸之額

陳倉驛東至鳳翔縣之岐陽驛九十里西至本縣之東河驛八
十里驛在縣署東內馬神祠三間捲棚三間馬房二十三間住
房差房併抄號木料房六間內號房三間乾隆四十七年知縣
張雲龍請項重修

東河驛考舊志係凍河驛不知何時改今名在陳倉驛西南八
十里南至鳳縣之草涼驛七十里驛內大門三間馬房二座共
一十四間正廳五間翼厦四間上房三間磨房一間
舖遞在城舖司五名字識一名南十里桑園舖舖司二名大灣
舖舖司二名十里楊家灣舖司二名十里二里關舖司三名十

里觀音堂舖司三名十里半坡舖舖司三名十里東河舖舖司
三名十里江龍溝舖司三名十里石窰舖舖司三名東路十里
西壕舖舖司三名十里東濠舖舖司二名十里蕭邨舖舖司二
名十里底店舖舖司三名
常平倉在陳倉驛東舊倉十八廩新倉七廩共二十五廩計房
七十八間外倉房一間厥神祠二間收糧所三間住房二間厨
房一間斗級更房三間

社倉十一處宣明社在城內常平之東孝悌社在賈邨鎮仁和
社在底店鎮遵儀東社在第五邨遵儀西社在王家邨淳化社
在閣子堡令遠社在天王邨富國社在斜坡涼泉社在馬營鎮
永豐社在瓦峪寺永寧社在城東關雍正八年知縣杜蕢生領
項建各倉房五間

坊表凡八永奠雞峰坊在縣城隍廟前明知縣朱炳然建號域
併幪坊在號縣鎮城隍廟前知縣李芝蘭修懷畏法廉坊在治
東中街爲西寧道楊灝建今改爲遵王之路額陳倉古道坊在
東關外今改爲陳倉舊縣額西街坊在縣治西街爲明監察御
史楊茂建以上諸坊現存及第坊爲明探花劉俊建東街坊爲
通判孔家訓建世魁坊爲通判高敷仵建俱圯

號縣鎮東西二坊東額曰武都故郡西額曰西號遺封陽平東
西二坊東額曰亭仍漢魏西額曰地界岐郿俱乾隆五十年知
縣鄧夢琴建

貞節坊十五一爲明孝子張綸妻趙氏建一爲楊光諭妻高氏
建一爲張乾妻高氏建一爲

國朝李茂華妻王氏建一爲高協緒妻強氏建一爲馮自壽妻

氏建一爲馮進喜妻楊氏建一爲袁遐齡妻貞女王氏建一爲
楊灝妻賈氏建一爲郭寬妻張氏建一爲楊大夏妻党氏建一
爲劉漢政妻王氏建一爲王文妻閻氏建一爲毛珍成妻康氏
建一爲寄士宏妻潘氏建

養濟院在縣治西街北乾隆四十七年知縣張雲龍重建

留養局在東關外乾隆二十七年知縣許起鳳奉文建

義塚四處一在東郭外官道南地約一畝餘一在官道北地二
畝五分前明知縣李養裕置一在金陵河西官道北地約一畝
鄉宦韓燧施一在西門外北坡地約三十餘畝相傳卽慶壽寺

遺址

里甲鄉十里五十三宣明鄉五里曰宣明福緣陵川壽南正
已孝悌鄉五里曰孝悌務本西渠清泉節用仁鄉五里

曰仁和底店底磴武安涼樓 遵儀鄉六里曰遵儀善慶慕儀
衆安仁義暖泉 淳化鄉四里曰淳化高泉與國洪原 令遠
鄉五里曰令遠青峰伐魚齊家渭寧 富國鄉五里曰富國磻
溪號川鳳鳴小磧 涼泉鄉五里曰涼泉雞峰八魚清水忠信
永豐鄉五里曰永豐崇德通川太寧晁峪 永寧鄉八里曰
永寧常樂安平固安敦化甲軍所衆好招墾
按舊志四十九里今增仁義甲軍所衆好招墾四里不知
何時所分
縣城東西街有市每日集附郭四邨東金臺坡北八角寺坡西
高家堡西南紙房頭 第一聯仁里堡去城二里曰東堡雙泉
川邨一百四十九 東第一聯仁里堡去城二里曰東堡雙泉
堡十里舖樊家灘張家邨上馬營劉家崖戴家灣 第二聯底

店鎮有市單日集去城三十里曰西卧龍寺收馬邨符家台南
城堡馮家嘴水連寨李家崖范家崖三盤溝魏家崖黃家崖張
家崖北李家堡北坡邨張家崖產寺邨 第三聯號縣鎮有市
雙日集去城五十里曰西堡東堡南堡北堡惠家灣高家坡上
橋堡皮李堡暖泉堡泰子溝閣子堡尉家堡東陽堡太公廟毛
家坡 第四聯陽平鎮有市單日集去城八十里曰第六寨菊
邨堡苟邨堡大帳寺西王家堡雙磧砣東西高泉大王邨夾馬
邨鮮家臺楊家堡毛張堡寺崖堡北冶氏邨
南第一聯古城堡去城五里曰北石家營東朱家營瓦峪寺堡
石壩峪鄧家庄相家庄桑園舖任家灣譚家邨羅家邨符家邨
龐家邨孔家庄塔稍堡 第二聯馬營鎮有市雙日集去城二
十里曰西涼泉邨小柞邨吳家崖郭家崖南樸確堡淳沱堡尅

家崖郭家邨溫泉溝姬家店淡邨堡潘家灣鳳皇頭 第三聯
斜坡堡去城四十里曰聶家灣菜子嶺小菴堡楊家店鳳鳴里
党家堡王家堡伐魚堡寨子堡 第四聯天王邨去城八十里
曰胥家邨東哨堡東陳家邨八廟堡朱家灘

西第一聯焦家廟去城三里曰西仁里堡太平堡福卜堡羅家
坡峽石堡到底邨 第二聯太寧堡去城二十里曰北謝家坡
趙家崖東高家邨

北第一聯北庵堡去城五里曰王家堰曹家崖北橋頭温家寨
姚家寨蔣家廟寺溝紅地溝劉氏廟周家庄葫蘆溝葛家河灘
浴池 第二聯蕭邨去城二十里曰王家崖劉邨張家寨仲家
灘劉家嘴大夫邨龍尾邨西渠灣圓山堡桃源邨

原邨六十四 第一聯蝦蟆口堡去城十里在陵原上曰楊家

庄翟家庄司家原柳家原段家原焦家溝李家孤塚常家溝

第二聯馬家原堡去城五里在紫草原上曰何家邨李家堡王
家孤塚張家坡朱家崖鄭家溝東坡西坡 第三聯賈邨堡有

市去城二十里在西平原上曰廣福邨大韓邨小韓邨東濠邨

三家邨胡家邨康家邨權家邨閻家邨塔寺頭索家邨南高邨

北高邨孤塚邨朱家邨杜家凹坡后邨東坡邨西坡邨鐘樓寺

東家寺馬塚邨魯家邨大槐樹西管邨曲慶邨上官邨 第四

聯第五邨去城七十里在周原上曰第四邨第三邨第二邨第

一邨油坊邨亞子堡高呂邨有禮邨文光邨王家邨營子頭慕

子頭俱家邨齊家邨孫家邨洞坡安坡

山邨五十五 西第一聯在渭北曰陸川方堂舖姜原馬家堡

秦王寨遼坡樓子山 第二聯在渭南曰縣頭嶺小寧溝胡唐

山李家河甘峪晁峪管頭焦遼楊家河周家川安平溝小節里
石門子仙靈峪

南第一聯在棧道北曰王家山高山堡西山堡大灣舖軍陽灣
二里關觀音堂張龍溝半坡舖凍河橋石窰舖暴家庄井兒下
黃牛舖 第二聯在棧道東曰茹家堡馮家原黃鹿原竹林嘴
馬鞍山喬家河高家堡陳家堡丁家堡廟溝堡支家堡燃燈寺
朱衣溝八魚堡高崖堡黃家山楊家山葦子溝眠羊嘴號川

學校

文廟在治西街宮牆內櫺星門三楹戟門三楹大成殿五楹殿
前東西廡各五楹建自元泰定四年教諭陳履謙明洪武九年
縣丞吳彞訓導郭誠重建宏治四年知縣丁瑄重修邑人吳獻
有碑天啟四年署令李治已重修邑人楊必達有碑

本朝康熙八年知縣陳肇昌重修邑人韓燧有碑乾隆二十一年
知縣董霽重修

崇聖祠在大成殿後門一楹殿三楹

名宦祠在戟門東祀漢魏令王尊陳倉令楊賜丞張元北魏武
都太守韋閻蘇椿蘇讓唐陳倉令薛景僊尉張行成劉仁軌宋
魏令蔡黃裳寶雞尉侯蒙元教諭陳履謙明知縣許莊師嘉言
陳以忠李嘉彥嚴夢鸞唐夢鷗縣丞江英教諭徐永達訓導高
遷

國朝贈兵部侍郎諡忠節前陝西督學道葉映榴

按祠內木主止六除師嘉言陳以忠徐永達葉忠節外如
陳履謙高遷無赫赫名者皆得與焉至漢唐以來之勲崇
銘鼎功在傳經以勞定國以死勤事者反致闕如又或治

行不見於茲邑而流風尙光於史乘亦應升祀以同攸好
特補王尊以下十四人應令有地治者聞之而興起焉
鄉賢祠在戟門西祀漢右扶風掾徐敖元宣撫使王楫明雲南
廣南府知府楊茂工部侍郎劉俊南京刑部侍郎張撫御史白
鸞順德府知府林恭肅府教授高遷夔州府同知楊祥楚府長
史楊汝宮濟南府同知王乾元吏部主事林紳大同府兵備道
李甲夔州府通判高數仞山海衛教授党魯鞏昌府教授劉文
顯東閣大學士楊畏知

國朝太保國史院大學士党崇雅

按今祠內無徐敖據漢書儒林傳補入王楫雖由金仕元
亦可與党崇雅同祀

忠孝祠在治西祀金忠臣德順節度使愛申部將劉興哥

國朝旌表孝子董成梅

按祠內只有董成梅一主據金史忠節傳補入愛申劉興
哥二人

節義祠在治東祀明生員張輪妻趙氏生員楊光諭妻高氏生
員張乾妻高氏

國朝李茂華妻王氏高協緒妻强氏馮自壽妻薛氏馮進喜妻楊
氏袁遐齡聘妻貞女王氏楊灝妻賈氏郭寬妻張氏楊松年妻
張氏韓密妻盧氏楊大夏妻党氏劉漢政妻王氏王文妻閻氏
毛珍成妻康氏

按今祠內惟有李茂華妻王氏毛珍成妻康氏王文妻閻
氏餘俱缺焉蓋緣卓楔雖表於生前而俎豆必歆于身後
逮完貞地下其後人不能送主入祠則缺典多矣今特照

冊增入又有乾隆四十一年

表從祀寄士宏妻潘氏舉報日淺其人尙存未能概附也

儒學在官牆東教諭署大門三楹二門三楹明倫堂五楹堂東
爲敬一亭今圯堂後爲尊經閣書房三楹教諭張其泰建兩翼
厦四楹

訓導署訓導門廸吉修建大門一楹敦說堂三楹內宅三楹翼
室三楹厨房一楹

書院三渭陽書院久圯基無考雞峰書院在縣治東佑德觀西
乾隆八年知縣喬光烈卽於佑德觀內捐俸延師設諸生膏火
十五年知縣周天生縣丞王秀慎卽於觀西捐建講堂三楹大
門一楹斷以礮溪里民楊應召崇德里民王大典等新開荒地
每年納租銀一十八兩有奇又知縣許起鳳捐買渭寧里關地

生地六畝每年徵租錢二千七百文又價買務本里張川地六
畝每年徵麥租折錢一千八百俱爲生徒膏火

石鼓書院在治東卽縣丞廢署乾隆二十七年署令郭元灝率
邑紳士捐銀一百二十兩買爲書院現在縣丞借住

按雞峰書院講次久虛乾隆四十九年知縣鄧夢琴雖延
副貢趙尙哲主席而修脯旣薄學舍庳隘不能廣招生徒
深厘文教待興自是年仲春爲始於朔望後之一日扁諸
生而課之次日卽課諸童來者不下百人少亦五六十人
課有饒優者有獎課藝俱克自振拔蒸蒸日上俟邑志告
竣後再行勸輸膏火以爲經久之計

社學九一在縣內西街有館所學地二十七畝一在號川里嘴
頭有館所學地四十畝一在渭寧里大王廟借館神祠學地二

十畝一在城內水巷口關帝廟一在金陵店關帝廟一在東關
神農廟一在太平堡周公殿一在晁峪里菩薩殿一在賈邨鎮
關帝廟俱借館

按省志義學二所一在學官西康熙二十二年知縣呂時
達建卽縣西街之義學也一在縣東五十里王家邨雍正
九年知縣梁成武建今已圯又學田原額六十一畝有奇
除荒額田四十二畝五分明萬曆二十四年提學沈季文
置又社學三等地十七畝二等地十畝俱呂時達置二項
分別存給現在社學九處俱前令喬光烈董霖周天生陸
續置亦有河灘地畝或係館師自收租息或撥租分給雖
距今已遠而家塾黨庠弦歌相望法良意美不可沒也

營制

駐縣把總一員額設在城兵二十名底店鎮塘兵五名第五邨
塘兵五名屬西鳳營

把總署在縣治東街本前邑令陳肇昌生祠改爲署

演武亭在東郭外舊築墩構堂今圯

二里關外委把總一員兵八名楊家灣塘兵五名觀音堂塘兵
三名半坡舖塘兵三名煎茶坪塘兵三名屬漢鳳營

東河橋外委把總一員兵八名江龍溝塘兵五名石窰舖塘兵
五名黃牛舖塘兵七名屬漢鳳營

川塘六處金陵河塘汛兵三名馬三匹屬泰寧營底店鎮塘汛
兵三名馬三匹屬川北鎮順慶營第五邨塘汛兵三名馬三匹
屬達州巫山營大灣舖塘汛兵三名馬三匹觀音堂塘汛兵三
名馬三匹東河橋塘汛兵三名馬三匹俱屬夔州協

論曰寶雞西連雲棧爲秦蜀之交衝所謂龍節虎旗馳驛
犇輶以去以來輟擊蹄劇者自古而然蓋既有往來送逆
之節則視塗授館固抱關者之職也昔孫可之題褒城驛
慨然有今昔殊異之感如其說則咎在假館者之夕至朝
去無顧惜心而於供饋者無與不知食食怠事責在有司
假令牧梁州者前後皆得其人安肯任其廢壞如所云云
耶嗚呼舉一驛而凡封疆田疇之正治城郭室屋門戶之
潤澤諸有關於建置者皆視此矣蓋環邑之所向而受成
于令當蒞事之時而或優游卒歲笑與秩終將自爲之不
暇而遑恤乎政果其勤心殫力職思其居旣已布政優優
而復出其餘力以修舉廢墜俾入其境者舉目而有精華
實息之觀夫安得以食食怠事之說繩之耶山是言之善

于其職者固未有舉其大而遺其小者也亦未有務其細
而忽其鉅者也是以柳子厚之刺柳州也大修孔子廟城
郭巷道皆治使端正韋丹之觀察江西也教民爲瓦屋重
屋復置南北市營諸軍于建置而次第之以學校兵戎誠
以事之先且大者不外是也况古者州序黨庠卽屬于州
長黨正若作民而師田行役則帥而致之其治俱統于一
至漢始令郡國立學校官置經師唐宋以後別有書院之
名則教之益詳其猶州序黨庠之制與自唐張說變折衝
府兵爲曠騎而兵民愈分矣今于建置一志終以學校營
制而義學鄉汛亦以次附焉庶幾因以自警不敢驛視州
縣爲老眠之所笑也

寶雞縣志卷之四

渠堰 關梁附

成國渠

漢書地理志成國渠首受渭水東北至上林入蒙籠渠

洫志關中靈輒成國漳渠引諸川穿渠灌田各萬餘頃 如

淳注成國渠名在陳倉 晉書宣紀魏明帝青龍元年穿成

國渠溉田數千頃國以充實焉 食貨志青龍初開成國渠

自陳倉至於槐里 宋敏求長安志水經注曰成國故渠故

魏尚書左僕射衛臻征蜀所開也上承汧水於陳倉東東過

郿及武功槐里縣按唐李石記成國渠見漢書地理志魏僕

射衛臻征蜀復開以灌田 古渠圖成國渠在縣東又東流

入郿縣界又自郿縣至扶風入武功界 省志成國渠經流

甚遠就郿縣境言之當是渭北之通濟渠扶風並無水利縣東之龍渠寺相傳爲成國渠故道然則其涸已久在縣境者不可尋其遺跡矣

昇原渠

元和郡縣志咸亨二年於陳倉東南引渭水入昇原渠通船至京故城注曰卽故長安城漢惠帝所築城在今故大興城之西北苑中

新唐書地理志寶雞縣注東有渠

疑卽成國渠引

渭水入昇原渠通長安故城咸通三年開

號縣注城西北

有渠引沂水至咸陽垂拱初運岐隴木於京城

長安志昇

原渠其原出沂水自鳳翔號縣城西北原流至武亭數里西南至六門堰東成國渠合流西南出興平縣界以其昇原而流故名之今涸疑今利民渠卽其故道但入渭而不昇原耳

通濟渠

省志明成化時叅政謝綬行部至郿縣引渭水灌田自寶雞開渠在縣東閻家營作堰東流入岐山界今跡久涇縣屬亦無閻家營地名

惠民渠

在治東四十里西渠里龍尾頭卽乾隆六年邑令喬光烈倡開自有記其渠引沂水上崖緣崖鑿石穿溝過水下灌李邨旱地數百頃然渠高水下拂其本性旋就堙廢

以上皆廢渠

今按現在蒙利之渠緣渭南北自西而東凡三十有五渭北之渠

玉澗渠

在縣西二里自焦家廟起引玉澗水入渠灌田五頃餘至紙房頭入渭

娑羅泉渠

在縣東二里引娑羅泉水入渠灌田一百餘畝至店子上入金陵河

金陵河渠

在縣東三里自金陵店引金陵河入渠灌田二十三頃餘至上馬營入渭乾隆四十九年知縣鄧夢琴加濬立碣

太白廟渠

在縣東十里張家邨之左水出太白廟後分二渠一渠東灌張家邨地一渠西灌劉家崖地皆南入渭

韓家崖渠

在縣東十五里引原下泉水入渠灌田六十餘畝南入渭

劉家崖渠

在縣東十五里引原下泉水入渠灌田一百畝合韓家崖水入渭

大庄邨渠

在縣東十五里引原下泉水入渠灌田一百五十畝流入渭

三疊泉渠

在縣東三十里底店鎮西舊有渠爲居民佔種稻地水壅不行漫溢官路乾隆四十九年知縣鄧夢琴清地復渠重加開濬引三疊泉水入渠灌田三百餘畝至曠野溝入渭有碣

蕭邨泉渠

在縣東北三十里出西平原下灌蕭邨一帶地東流入汧

利民渠

在縣東北五十里石鼻寨開自前明宏治年間其興廢具見碑記

本朝果親王詩

太守開渠民利賴停車使者為題詩好將南畝勤耕作更勉兒孫孝弟規

邑令鄧夢琴重修利民渠記

關中自秦用水工鄭國鑿涇水自中山西邸瓠口為渠並北山東注洛三百餘里漑澤鹵之地四百餘頃皆畝一鍾秦以富饒即所謂龍洞渠也漢唐以來六輔三白諸渠興廢迭更我朝

列聖相承軫念民依興復古制雍正五年岳查兩制府遵奉

諭旨疏濬鄭白龍洞各渠專員經理於是水利之沃甲於關東河

北諸直省乾隆四十九年四月中丞畢公援歲修渠道入

奏併相度復舊疏新各機宜檄下至縣按縣在古分為陳倉魏

縣二邑陳倉故有成國渠其瀆上承泧水過郿武功興平至

六門堰合昇原渠入渭昇原渠出魏縣西北亦承流泧水唐

垂拱初運岐隴木入京城自宋敏求志長安時其洞已久至

東渠之合渭通舟者俱無故道可尋其可廣收為灌漑之效

者惟縣東之利民渠耳考渠係疏自前明錢沈二郡伯省郡

志已軼其名渠記惟志錢為宏治年間人入

本朝來邑令錢首濬於雍正十三年至乾隆十五年邑令周續

修之廿有九年邑令許復修之今又越二十年矣余奉檄後

履勘至止居民具言渠口久湮不惟仰灌無獲并井汲無資

惻然念之署丞王君哦松多暇卽令鳩工集事余時爲之相
高下之宜指陳獎勞王君戴星宿郵居民亦暮鼓弗勝經始
於九月中浣竣工於十月之杪因其故道濬源達委自鳳翔
縣之高嘴頭引沂水入渠東至遵儀里之楊家溝張家崖又
東至善慶里之黃家崖又東至逆陳崖賀家崖閻孟崖魏家
崖王家堡又東至武安里之馮家嘴高陳崖又東至底禮里
之劉家小堡劉李崖范家崖關家崖又東至涼樓里之惠家
灣高家陵灣溝堡順流入渭俱疏濬通暢寬八尺深六尺兩
岸培堰若隄防經行四十有七里舊灌田三十頃七十畝有
奇增灌田四十九頃有奇其餘金陵河三疊泉溫泉各渠載
在縣冊者均各以次興修灌田各數十頃至十頃不等其事
之顛末可記者如此夫審端徑術以教道民有司之事也用

民之力因民之利而又得人以襄厥事受成者未敢尸厥功
也會大府考成甚殷卽次第以聞蒙檄下其事於諸州縣併
令續濬泉渠之可利田疇者關中八水迴環百泉噴湧雍州
所稱厥田惟上上也當事仰承

樂利之休勤思民事百執事繼此講求千渠百堰灌溉盈疇於
區區一渠何有然藉此以爲之嚆矢則民力善存同寅協恭
之惻摯爲不可沒也其善後經久之謀俱仍前畫同事者以
意叅酌之另鑄於別石王君名廷璧直隸滄州監生由

四庫館修書議敘州同署寶雞縣丞前邑令錢名界浙江海鹽
歲貢以孝廉方正任周名天生江蘇吳縣人由監生任許名
起鳳浙江昌化人由進士任鑒於錢沈二郡伯之軼其名連
類書之俾來者有所考焉

太公廟渠

在縣東北六十里自太公廟起引原下泉水入渠灌田八十餘畝至曠野溝入渭

鴿子堡水渠

在縣東北六十里引原下泉水作渠二道灌田六百五十餘畝合流入渭

安坡泉渠

在號縣東小蓬壺旁兩泉合流歷閣子底至皮李堡灌溉甚溥南流入渭

西高泉渠

出磨性山下兩泉合流歷鮮家臺張家堡灌田轉磨至楊家南溝入渭

東高泉渠

治東七十里水出周原下兩支分流一支東向灌溉洪原等邨至寺崖頭東流入沈公渠一支西歷毛張堡至大王邨灌田轉磨南入渭

按新唐書地理志號縣東北有高泉渠如意元年開引水入縣城卽此渠也舊冊未悉原委有毛家坡引坡根泉水一渠不知毛張堡背倚周原而又聲轉之訛當釐正以備考

沈公渠

在縣東陽平鎮西北明崇正間郡守沈公開濬自寺崖頭等邨衆泉合流成渠東至陽平菊邨由岐邨入渭灌溉五十餘里爲利甚溥沈公名縉湖南武陵人府志無傳

渭南之渠

大寧河堰

在縣西南二十里引大寧水灌田一百六十畝

高家溝堰

在縣西南十五里引高家溝水灌田七十畝

塔河堰

在縣西南十里引塔河水灌田一百二十畝

清澗河渠

在縣南二里自任家灣起引清澗河入渠灌田五十頃餘畝

至石家營入渭今按城南姜水堰分東西四壩灌田俱引姜

水即清澗河西自龐家邨東至瓦峪溝五里許為利甚溥即此渠

也

瓦峪河堰

縣南五里引瓦峪河水灌田百餘畝

石壩河堰

縣南六里引石壩峪水灌田百餘畝

龍山河堰

縣南十里引龍山河水灌田三百畝

涼泉堰

縣東南二十里引涼泉水灌田五十畝

高家崖渠

在縣東南三十里自高家崖起引清水河入渠灌田二百餘

畝至賀家嘴入渭

山門上渠

在縣東南三十里自山門口起引清水河入渠灌田三百餘畝至孤塚入渭

溫泉渠

在縣東南四十里自楊家山起引溫泉水入渠灌田四百餘畝至淳沱堡入渭

郭家邨渠

在縣東南四十五里自郭家邨起引溫泉水入渠灌田三百餘畝至戚家崖入渭

以上四渠原有舊跡埋塞不流泉水漫溢地上行人躑躅乾隆四十九年知縣鄧夢琴親履疏濬各分爲東西兩渠水有所歸其餘古渠十道亦皆以時濬修另疏小渠六道一律通深灌汲兩便民忘其勞

安康董詔濬渠謠

中牟徵三異西蜀歌五袴何如賜豐年民孰與不足豐年何由賜天地人交乎感天膏不屯用地渠能雨有客來陳倉行野當秋暮阡陌汧渭間黍稻青黃錯栖畝驚雲屯登場羨京聚祝不違豚蹄秉多遺婦孺問此畝一鍾得非力倍作扶杖有老農歡然道厥故地邊古雍州川原雜險阻土惟黃壤域澤近茲蒲藪水經注汧水源卽茲蒲藪兩山必有川萬井可挹注成國溯漢濬昇原沿唐疏豈無古溝澮歲久各湮淤力田年幸逢作苦酬亦裕偶值雨暘愆繼同庚癸呼賴有慈惠師下車經營遽博詢南北源細審高下度茲實利民渠派向汧流沂渴澤恥罄餅石田難分厚力爲議遠邇勞不避沮洳陟巘躡屐升降阿乘橈步成局已在胸按節曲相諭智以不鑿行工如因

物付共孚惠我德誰懷厲已懼亞旅先辰集畚揭旁午具決
渠雲是門就下壑爭赴猶恐水能齧勸於岸栽樹數渠渭左
右盡淪水來去告客今歲收實異昔年數請說春夏交麥禾
畦睦布神農方持功靈雨勞呼額精專感易孚時行霖輒樹
兼復水地圖久爲灑陸豫遂均澆旋瀉根浸葉不菸勢速抽
筍風潤滴垂穎露眞見苗如握誰信長難助占孚衆維魚困
蘇轍游鮒非公使有鳩豈免營如鷲共歌化日長豫卜豐年
屢下以盈百室上之供二賦菽粟無弗與社蜡行可醪今年
大歡樂勸客且堅住莫謂老耕鑿不解達情悵願效與人誦
豈慚山農固會當春酒熟看致稱觥語歸來宴吾私寧使悵
弗顧雖殊籩豆儻且喜兄弟飫佇俟東作興復營南畝務
馬峪河渠

在縣東南四十里引馬峪河水入渠灌田八頃餘至鳳皇頭
入渭

清溪堰

在縣東南四十五里小庵堡下引清溪泉水灌田三十畝

磻溪河渠

在縣東南五十里自楊家崖起引磻溪河水入渠灌田六頃
二十餘畝至楊家店入渭

伐魚河堰

在縣東南六十里引伐魚河水灌田四十畝

伐魚河東渠

在縣東南七十里自伐魚堡起引伐魚河水入渠灌田八頃
五十餘畝至胥家邨入渭

龍泉堰

在縣東南九十里翠麓亭下引龍泉水灌田三十畝
八廟邨渠

在縣東南九十里引仙槎溝水入渠灌田六十畝

關梁

益門鎮

賈志在縣南十五里元末李思齊築以備蜀
年蜀將王友仁攻興元守將金興旺請援時徐達在西安卽
帥師還屯益門鎮
白鸞修鎮志陝西旣入關平行千餘里
西南抵寶雞復岩然山合惟一隘口始入是爲益門鎮秦山
嵯峨清江滉漾路惟鳥道出鎮而南雲梯百折達荆梁通瀘
益名鎮以益義取諸此明邑令許莊修廢雉題曰益門雄鎮

果親王詩

峭仞奔霆會益門亂峰中裊一絲行更登大散關頭望無數
雲山此送迎

新城王士正詩

天險當秦鳳提封界雍梁棧雲高不落隴樹曉還蒼古埃催
征騎秋風弔戰場山南明日路漸入武都羌

二里關

賈志在縣西南四十里古置關遺址尙存
元史鄭鼎傳中
統初鼎從伐蜀攻二里散關
明史地理志寶雞西南有二
里散關
舊志據高嶺上長亘二里因名乃棧道必由之路
今有分防把總駐此

大散關

後漢書順陽侯嘉傳建武二年與延岑連戰岑引北入散關
至陳倉追擊破之章懷太子注散關故城在今陳倉縣南
十里有散谷水因取名焉唐書地理志寶雞西南有大散
關杜氏通典散關舊關故城在寶雞南九域志寶雞縣
有武城車舍大散三大鎮宋史紹興十二年棄和尚原方
山原以大散關爲界中興四朝志大散關屬梁泉縣梁泉
道縣魏太和中改
元至元省入鳳州在寶雞縣南爲秦蜀往來要路自關距和
尚原纔咫尺兩山關控卽絕出可以攻入可以守實表裏之
形勢也明一統志在縣南五十二里大散嶺上通褒斜
舊志大散關亦曰散關爲秦蜀襟喉南山自藍田而西至此
方盡又西則隴首特起汧渭縈流關當山川之會扼南北之
交北不得無以啟梁益南不得無以圖關中今按在縣西

五十三里姜水盡處突然一嶺面臨神岔橫扼棧道由青石
崖北入直抵雲蓋寺約二十里上極廣闊足容人馬

王維自大散以往深林密竹磴道盤曲四五十里至黃牛嶺
見黃花川詩

危徑幾萬轉數里且三休迴環見徒侶隱映隔林邱颯颯松
上雨潺潺石中流靜言深溪裏長嘯高山頭望見南山陽白
日靄悠悠青臯麗已淨綠樹鬱如浮曾是厭蒙密曠然消人
憂

李商隱赴東蜀辟至散關遇雪詩

劍外從軍遠無家與寄衣散關三尺雪回夢舊鴛機

明胡汝霖棧道感懷詩

長劍嗟何倚焦桐悵獨攜十年錦橋柱萬里浣花溪浪跡違

鷓鴣霜天入寶雞益門紆碧澗秦嶺折丹梯仄徑堅冰合危
橋怪石擠雲林深不測颺颺自應迷行李誰東道空囊挾病
奚庸踈虛努力薄劣足塗泥失路須存馬抨弓忍射麋流離
分老稚凍餓輟耕犁死結鶉衣短生餘垢面驚有心摧舊血
無淚續新啼日氣千山暗風聲萬壑淒側身思漢輔何計拯
周黎目極江湖闊心懸雨露低職司俱惷惷容好暇提提野
戍曾烽燧郵亭繫馬蹄倩人給薪水徒步劇攀躋縮綬愁多
緒彈冠汗浹題那堪筋力盡且畏簡書稽流水能相送停雲
似欲徯高歌生感激佇立重酸悽安得陽春布堪投谷口棲
比鄰安服食出入混東西

新城王士正大散關詩

石壁橫千仞盤盤上翠微行人紫閣轉鸚鵡下山飛戰壘空

埋鏃巖關幾合圍雲車與風馬髣髴夜深歸

金牙關

明一統志在縣東南一百二十里今按在縣東南一百五十
里號川要地蜀漢捷徑以勢如張牙故名

模壁寨

在縣西南五十里通鑑南漢乾祐初蜀將安思謙救鳳翔遣
別將趨模壁

潘氏堡

唐書楊晟傳光啟二年晟守大散關朱玫攻關晟戰於潘氏
堡遂大敗通鑑胡注在寶雞東北未詳里數

神岔

在縣西南三十五里有上下神岔之名宋史吳玠傳紹興

龍門
元年金人攻和尚原玠設伏於神谷敗之

金史完顏綱傳蒲察貞分遣木虎合沓等出黃兒谷取和尚原女奚列南家等出大寧谷取西山寨自以兵由中路取龍門

按馬峪河谷中有一石門深數十步止容一人一騎其旁山蜿蜒而下形狀如龍故俗名曰龍門

龐李溝橋

在縣西五里

硤石橋

在縣西十里有前明邑人賈蘊重修碑

磚固橋

在縣西二十里

凍河橋

在縣西南七十里煎茶坪南

江龍溝橋

在縣西南八十里旁有石窟深不可測每雷雨則魚出

張龍廟溝橋

在縣西南八十五里石窰鋪東

大欄橋

在縣西南一百里黃牛堡東

石家橋

在縣北二十里

論曰唐地理志注寶雞縣東有渠引渭水入昇原渠號城

西北有渠引泝水至咸陽元和郡縣志成亨二年於陳倉縣東南開渠引渭入昇原渠均未注其何名而元和志又云成國渠在郿縣東北受渭水以溉田亦未著其渠之在陳倉漢志成國渠首受渭長安志引水經注成國渠魏衛臻征蜀所開也上承泝水於陳倉或疑漢成國渠只引渭水魏時重開乃兼引泝水邑舊志乃謂昇原渠有二一引泝一引渭均通京城於是其源既昧其流益岐矣不知縣東爲泝渭之會泝水自今之魏家崖入渭成國渠首受渭水實兼承泝水長安志之援據鄙注原不悖於漢志元和志昧成國渠之上流僅以其經於郿縣者當之不知其所云陳倉東南之渠卽地理志所云寶雞縣東之渠卽郿縣東北九里之成國渠也惟長安志載昇原渠至六門堰東

成國渠合流則與唐志之引渭水入昇原渠者合而與元和志陳倉東南之渠引渭水入昇原渠者亦合其所謂東南之渠與地理志縣東之渠卽漢志之成國渠也蓋成國渠自漢至唐通塞不一咸亨中所開雖或仍其故道未必如前此灌溉之溥故其名不著元和志知成國渠在郿東北而不知陳倉東南之渠卽其上流地理志注只云引渭水入昇原渠未著其經流之遠近故疑以傳疑非長安志濬其源導其委則群疑莫釋矣顧禹貢之任土作貢也必先表其山川職方氏掌天下之圖以掌天下之地要之以周知其利害蓋川以穿渠溉田山以設關守險俱與井牧之意相通也邑之水利最溥者惟成國昇原二渠其阻隘最險者厥惟大散關宋金相持之際紛紛戰壘矣舊棧道

在邑之西南由大散關和尚原以達於黃牛堡元史天澤
朝憲宗於散關是憲宗必由茲以入蜀今棧道在邑之南
歷益門鎮二里關至煎茶坪以達於黃牛堡李思齊進兵
益門鎮以討四川則不復由散關矣今舊棧既廢人跡罕
通而明時有二里散關之名幾幾以二里關爲大散關矣
舊志雖別二里散關爲二亦不能披山通道尋其故址夫
水則易遷山則不易乃自元至今上下數百年間而險易
難考如此况水道之通塞無常廢興視乎其人者哉

漢自黃牛堡至煎茶坪一線中其地甚險未
南之與與散關亦非東之與西亦非西之與東亦非
亦非東之與西亦非西之與東亦非西之與東亦非
亦非東之與西亦非西之與東亦非西之與東亦非

